

甘肅新通志卷之九十九

方伎

不爲良相必爲良醫黃帝內經成於岐伯爲千古方書之祖下此百家衆伎之流亦各有專長可取

聖世無棄材苟非左道惑人未有不兼容並蓄者志方伎見與異端邪說迥不同云

上古岐伯北地人生而神明精醫術通脈理黃帝以師事之有素問難經行於世

漢楊子阿成紀人善相馬馬援傳援好騎善別名馬於交趾得銅乃鑄爲馬式還上之因表曰近世有西河子輿亦明相法子輿傳西河儀長孺長孺傳茂陵丁君都君都傳成紀楊子阿臣援嘗師事子阿受相馬骨法考之於行事輒有驗效

甘肅新通志

卷九十九

志餘 方伎

公孫昆邪義渠人著書十五篇主陰陽五行之術

嵩眞安定人明推演精占卜成帝時眞常自算其年壽七十三綏和元年正月二十五日晡時死書其壁以記之後於二十四日晡時死其妻曰見其算時長下一籌欲告之慮拂其意今果信矣眞又曰北村青隴山上孤檟之西有靈穴鑿七尺葬吾於此地中及眞死依其言往掘得石槨空然卽以葬焉

晉戴洋字周流長城人善風角解占候豫州刺史祖逖病篤遣人問壽於洋洋曰祖豫州九月當死果驗以有妖星見於豫州之分也郭曆西平人明易仕郡簿張天錫末苻氏將西伐太守趙凝使曆筮曆曰若郡內二月十五日失囚東軍至涼祚終至期鮮卑折掘送馬於凝凝怒其非駿囚之鮮卑懼夜遁凝告曆曆曰國家將亡不可復振苻堅末當陽門震刺史梁熙問曆曆曰富有外國二王

來朝一當返國一死此城歲餘而鄯善及前部王朝于苻堅西歸  
鄯善王死于姑臧呂光之王河西也將伐乞伏乾歸曆諫曰今太  
白未出不宜行師往必無功太史令賈曜以爲必有秦隴之地及  
克金城光使曜詰曆曆謂光曰昨有流星東墜雖得此城憂在不  
守正月上旬河冰將解若不早渡恐有大變後二日而敗問至光  
引軍渡河訖冰泮時人服其神驗

南北朝苗光易北地人精於占卜之術事能預知其故宅猶存

唐孫真人名思邈嘗隱於渭州東北艾蒿山其山多產艾療病殊效  
思邈日採之曝於石爲人療疾旁有濯足泉今通渭縣遺跡猶存  
縣西尖岡山有真人墓或云仙人岔卽其故里

魯般敦煌人巧侔造化與春秋公輸子同名嘗怨吳人殺其父於  
肅州城南作一木僊人舉手指吳地大旱三年卜曰般所爲也齋

甘肅新通志

卷九十九

志餘 方伎

二

物謝之般爲斷其一手其月吳中大雨

元楊恭慶陽人有精思巧技能造五兵於武藝尤嫻習

明羅理正甯人工畫每寫動物儼有生氣魏國公嘗見所畫真武神  
像願以百金購之

毛延齡安化人精塑像慶陽之嶽廟神像及三官真武觀音諸像  
俱其手塑也後之工此者見之斂手惟以金碧裝飾而已

耿榮慶陽衛人凡刀劍鉞稍之製咸得其妙有業此者一經其指  
誨皆擅名於時

張鐸慶陽衛人爲兒時見其兄錦能作畫卽領悟之遂以畫名家  
翎毛尤精

張澄慶陽衛指揮使少諳聲律尤工於洞簫每吹令人傾耳忘倦  
一日承襲至京師以簫擅名者亦遠讓焉至以簫史比之性敦厚

每抑己以成人之善不獨才技擅長也

陳泰初爲慶陽衛百戶性剛直騎射超羣以驍勇選掌號於邊營走馬射鵬一軍皆驚宏治末以斬級功陞千戶軍政衛掌印十餘年解組後杜門課子孫讀書子欽以功陞指揮鑑亦知義世傳其武藝

邱耀鎮番人嘉靖三十一年歲貢官山西蔚州訓導擢直隸景州學正善頤養兼通術數

王國均鎮番人副將允亨子幼承庭訓博學工書由指揮僉事任莊浪參將縣治古剎中多遺翰子印昌本衛掌印守備

賈老人其名莫考合水人明時隨父任於山東從孔明醫學診脈能知人窮通得喪其子心傳亦能以善醫名於世

楊沛生合水人善風鑑凡遇人一相能言其心術生死可預決更數十人無或爽者時人喜其論斷且畏服之焉

### 甘肅新通志

#### 卷九十九

志餘 方伎

三

張好問字希明其先高郵人始祖仁以醫事韓藩遂家平涼好問尤精祖業常不拘古方唯濬病源弗問貧富校業禮官爲良醫正診視神驗所著有張氏醫精太素集時巢鑑由浙寓華亭爲隴西王侍醫又劉聰本府人皆能療治奇應擅名一時

張仙童安化人少從羅理凡繪畫人物皆稱神妙今興教寺有羅漢十八幅并寒山拾得之像儼然如生

禁神甯州人精呪法能禁瘡毒及蛇蟲諸害每旦持水向四方呪祝願十里之內人畜不罹瘡毒蛇蟲之害積年漸加多至百里凡人求呪瘡毒隔山應氣而愈遠近以法師尊之後坐化人立廟祀之其廟中土至今取而傅瘡亦有愈者

蔡嘉善字建陽武威人世傳醫業純以濟世爲心活人甚多沒後

人立祠於三皇廟側以祀之

張琦甯夏人精太素脈斷疾病生死踰二十年必驗

張景皋甯夏人精太素脈可生則藥不可生斷以時日百無一失窮通天壽以脈推之亦無不驗所著有難經直解

張銘安定人得祕書於耕地心解其義遂精讖緯之術奉詔引見賜金玉帶各一授欽天監職

康永惠號樂安鞏昌萬壽宮高士也遇異人授雷法其術最祕歲早祈禱立應兼通醫後雷法不傳子壽遂精醫

吳通甯夏人精脈經本草素問三書妙鍼法治病輒效時稱儒醫黃俊甯夏人治病以脈不拘方書尤精藥性自宋至明世稱良醫今絕傳

方峻甯夏人精醫道尤善傷寒所著有瘡瘍論子策擅專門之業

### 甘肅新通志

### 卷九十九

志餘 方伎

四

求遇者如市贈指揮

徐恭甯夏人精小兒科藥效如神子英中屯衛指揮僉事歷官清慎制行端潔醫以家傳術能起死回生不擇貧薄深夜風雨必往人甚德之

胡傑甯夏人精外科善識瘡善惡之形尤能治療無名毒其瘰立效子瑾業愈精於傑

毛仁狄道人精醫術用藥立效嘗至人家診脈有木工方跨屋運斤聞仁至卽躍而下謬戲之曰我何病試診之仁診良久大驚曰君自高而隕腸已斷矣速歸猶可抵家其人惶怖急返行數武腹痛死

呂朋璧甯州廩生惟幾之子因侍父疾遍讀方書頓成奇醫問人病狀投餅一服立效日施藥不厭人服其神異素善琴乃從琴韻

劊爲琵琶清音長安宗藩夙以善絃名者聆之退舍尋著琵琶譜  
祕不傳

武敏字志學皋蘭人少孤能自立業醫養母不遠千里求教名醫  
活人甚衆不責其報好書史能詩善琴蘭之善醫者多出其門  
芮經甯夏人通脈理修治丸散尤精往往有奇效一時重之  
宣士能甯夏人以瘍醫稱良於時

濮恩甯夏人識方書療疾不擇貧富尤精傷寒

蘇庶甯夏人精外科嘗治人所不敢治者累有奇效

范廉號雲峰甯夏人精山水人物並臻逸品與沈石田碧峰同時  
齊名有畫中二峰之譽慶藩王重之館府中嘗以其畫貢內府

國朝劉恆久甯夏人名醫也用藥有制雖雜證不過三劑診脈能立斷  
人生死遲速當時醫人診人疾必先問劉先生診否其見服如此

### 甘肅新通志

### 卷九十九

志餘 方伎

五

徐宣化英之後審於用藥投無不效尤精小兒之疹痘一見輒定  
生死鄉里其稱神效其弟鯤年十三卽潛心醫學四十餘年表裏  
洞澈尤精於修治丸散

天中子姓路氏秦安人精數理書法酷似鍾繇每署款題天中子  
康繩周任後衛教授精風鑑順治十八年甯夏巡撫薦至京視  
皇陵有功 賜銀幣授欽天監博士

王覲光字見青原籍紹興人爲甯夏道于從濂幕客博涉多能善  
談論尤精於堪輿有言葬地吉凶者或就其穴撥正之輒有驗所  
著有地學正誤甯夏河西堪輿論

胡鉞字漢西甯夏人國學生候銓鹽運同知儻有才能爲川陝  
制府幕客工繪畫山水人物皆極清秀當時重之

魏元勳號愚山甯夏人康熙戊子武舉能詩有移山草工書畫師

米以畫竹馳名

許世延環縣人字卜年乾隆中恩貢方學敦品不逐時趨尤精於醫理邑人遺疾者皆就訪飲以藥卽愈當事爭禮之性廉靜雖出入公門未嘗一語及私

李啟明安化人幼業儒長無意功名耕田黑泉峪樹藝之暇究心六壬屢遭兵變皆不預其害

劉恩甯州人精醫術活人無算監司張某延診其妻之疾恩曰孕也當二十四月媿男叱之不信尋驗乃大奇之馳書幣以贈

李鳳翔正甯人精脈理用藥輒神效所活數萬人咸以爲和緩復生云

楊有德中衛庠生精醫業以術活多人邑人稱之

張登第鎮番人與弟登甲俱精於易占驗如神性友愛痛登甲早

甘肅新通志

卷九十九

志餘 方伎

六

卒不希仕進遂以諸生老

曹企鎮番生員工書法以軍功議敘乾隆三年授山東兗州府通判

李紹菱鎮番人乾隆十七年歲貢少聰慧博極羣書通術數尤精於醫決言凶生死率多不爽著有醫經若干卷

鄒廷賢字殿楚甯夏人工畫人物花卉冠絕一時用筆準繩極細而自有生動之致

傅唯寬字敬敷甯夏縣學生善繪事以葡萄著名隨筆戲作多得古人法外意

劉道士軼其名固原人善祈雨精通甲乾隆初遇旱必延之入壇能決雨至時刻不爽屢著奇應時人爲之諺曰劉道進壇廟大雨如盆倒

鍾先鳴甯朔縣武生古道自持不趨時好書法邁勁臨摹古帖至老不疲作字必正鋒取法二王大書尤奇古甯夏先後善書者皆推遜焉

戴紹祖甯夏人負氣倜儻多藝能尤精馬射云得自滇南某將軍隨手變化左右無方各標名目且多至四十餘套云

張映槐字樹滋甯朔增生嗜學多能尤精周易課卜事輒驗又善營造前知府顧聞其名延之督修銀川書院南郊外文昌閣亦其所經理重建者

雷逢源字守妙號天然子秦州人性沈靜簡默精於醫內科兼好道術手寫醫書道經數十卷晚遇藍道人授以太乙遁甲之法所得益深邃醫道亦益進其後子孫世用醫顯全濟無算

周衍烈秦州人少孤家赤貧母萬氏苦節鞠之長通易道遇異人授以鍼灸法療病多奇驗尤善治婦人無子之者每走數百里邀請一鍼卽娠育醫家驚以爲神竟莫知其何術

陳翊運字元吉秦州學增廣生學究術數喜爲人拯厄解困光元年州境旱蝗知州淡某聞其有致雨術聘令祈禱妻諫曰聞以術致雨者殃子孫何復乃爾翊運曰苟利秦人死且不顧况子孫乎禱三日雨大沛蝗亦竟息知州厚餽以金且贈詩爲謝翊運受詩反金後數月三子相繼夭歿妻怨之日夜哭詈翊運無辭以辯避之蘭州賣卜於市一人持年庚帖問病翊運曰死矣問者曰來時病人方端坐自寫年庚授我何遽至此翊運促之曰急歸或尚得見遲必無及也其人趨歸果然自是神卜之名大譟楊遇春出征回疆將聘翊運入戎幕有忌而沮之者遂歸臥家園焚香讀書絕口不談休咎年九十七而卒卒後數十年里人每有急難輒思

之曰使陳元吉在當不至是也

馮 某夫婦採藥而至人有病疹療之立愈夫婦同終甯遠縣南鄉人葬之至今有疹者往往禱之以爲有靈塚上冬春生青草地因以名

李本固甯遠人家貧好學精脈經本草在家日炮治丸散凡遇貧家病必給之平生讀書輒高聲朗誦至老不倦

楊星海皋蘭人善醫根柢內經宗仲景嘗言景岳易六味八味爲左歸右歸施之太虛固神效少實久服必有壅滯之患無丹澤之妙運也醫家皆信其言

滕祖周皋蘭人邃於醫學方多明效暇則焚香誦讀至老猶勤卒年七十有餘

蔡振鐸甯朔增生熟讀岐黃在滿營懸壺尤精於痘科定其吉凶

### 甘肅新通志

### 卷九十九

志餘 方伎

八

三年必驗人稱蔡神仙性愛人遇貧寒家無買藥資者輒陰留錢以濟之著有藥書數卷未刻于天藻仕至知府

王有莘陝西人習醫術內外科流寓甯郡城子萬賢孫景朝等八人繼其業治病不擇貧富來延者風雨晦明咸徒步以往藥不索重資無力者未嘗責償也人稱三世醫

李杜甯朔增生天資過人善書法精醫術

陸溥甯夏人醫書多所綜覽過目不忘治痊之病雖十年後猶能記憶蒙古王每延以治疾爲世良醫

大脚雷師不傳其名固原關帝廟住持也咸豐中自云已百歲精黃白術日食紅棗三枚清水一盂從不舉火禱雨尤應忽自言某日當化去至期端坐而逝時有遊於涇陽者中途遇雷雷授以鑰具日請歸以付吾徒其人既至固始知途遇之日卽雷坐化之日



也至今奉祀者輒以巨屨獻之稱曰大腳雷師

雷思禹工於繪畫捏塑精妙伏羌縣藥王廟塑十大名醫像面目如生膾炙人口

徐鉉字在金泉蘭 恩貢生品行端方以教讀爲業善岐黃徐氏世傳醫學鉉其最著

楊維仁字伯廉泉蘭人爲縣醫學訓科幼嗜醫術弱冠南游江浙訪師得吳江徐大椿醫書六種以歸後師事古浪李資深復得錢塘張志聰所註素問靈樞傷寒論及本草崇原等書潛心體究至忘寢食故診病洞見本原無不應期奏效生平論述最富皆能發前人所未發晚尤好易著有周易匯參傷寒體註醫學楷梯等書維仁孫發甲爲府學醫正科同治七年奉調赴甘南大營行至車道嶺遇賊被害

甘肅新通志

卷九十九

志餘

方伎

九

趙沖谷字懷亭泉蘭人性端謹和易精繪事花卉翎毛點染生動人物多用指畫亂頭粗服奕奕有神山水亦工秀

崔奇石字蒿齋楊翰字墨林泉蘭人俱善畫奇石山水師李世倬筆墨簡淡翰山水翎毛師馬負圖人物撫雪峰道人頗有心得

王允中字南谷泉蘭人工琴善畫山水人物俱佳晚年失明通數學精占卜其子應瑞邑庠生亦善畫又張允中字精一工畫花卉

王蕙泉蘭人善草書工畫花卉次子祚洪工畫竹

龔翰字浩亭畫山水工秀絕倫人多寶之  
林得全林廷瑞泉蘭人畫俱摹米南宮頗有神似處林逢春山水亦工緻

王曉霞名岱以字行泉蘭人父修德善摩窠大字岱工畫山水筆力絕高生平頗多合作同時溫又新字虛舟亦工山水

袁思義甯朔軍功熟讀脈經在定遠營設肆行術四五十年無誤治之證用藥數劑卽愈子權繼之兩世均以醫名

王永和甯夏人棄儒習醫用力二十年精於傷寒子鶴年繼其術王生蘭甯夏人精堪輿術不受謝資持齋修行門徒極衆五世同堂一鄉稱之壽八十餘卒

郭珍皋蘭人善畫人物山水蒙古王常請至旗下奏技以所畫貢內廷

陳眞如甯夏道士也精通六壬課善畫梅

賀嘉祥精於地理博讀諸家書給事中郭亮甚奇之平涼道武全文命遍相諸州縣江西督學宋祖法不遠數千里延致之

袁文蔚字東井狄道諸生明黃帝內經精醫術投藥立驗洮人稱爲神醫

## 甘肅新通志

### 卷九十九

志餘 方伎

十

雷成基邵陽人僑寓伏羌牛蹄鎮精方書尤善外科手製珍藥所費不貲遇貧乏輒施與之醫富者病愈聽其自謝從不索值有長厚之稱生一女授之小學女誠諸書有善相者奇之謂當作配玉堂清望後果然人以爲陰德之報

宋堂字伯升秦安貢生善接骨蓋祖傳也救人跌傷以數千計未嘗受人餽謝素業農商資產累巨萬荒年施粥賑飢又嘗置義塚費過千緡旣卒帛者千餘人子兆奎猶承接骨之法邑人賴之魏國彥秦安武生善外科醫人不受謝嘗爲人毒嘗聞者不堪翌晨未曙有啟門入者問之則嘗己者之次子患疔毒也遽問曰飲水否攬衣卽起醫之而去

朱某行三人以朱三稱之素業屢有道術善符水治病如神遇鬼魔作祟者誦呪呵氣頃刻見效不受人餽遺然其人誠樸安靜自

稱賤工而已

楊清化化平回民年七十餘精神矍鑠掌教本城寺生徒甚衆講經不倦教下來寺者誠僞吉凶莫不豫知臨終遺言戒種罌粟將來必嚴禁後果如所言

赫明德化平龍家峽回民性聰穎寡言笑辟穀煉氣每日服棗七枚靜坐寺中點念天經祈晴禱雨靈驗弗爽人爲邪風所迷求吹氣和湯服之立愈臨終坐化

蘇宏珍固原回民嘗居於風臺山悟清真理每早卽誦天經行坐泉之法計生平祈雨有應者四十七次及歿告其子孫曰當葬吾於風臺山子違其言仍卜兆於舊塋將葬忽失足指越一年夢示其足指之所在子往掘得之其教中人皆以爲異乃遷骸於風臺之麓至今回民多禮祀者